



Broj: 08-07-2-580-7/2016
Sarajevo, 15.07.2016. godine

**PARLAMENTARNA SKUPŠTINA BIH
PREDSTAVNIČKI DOM**

n/r gospodina Mladena Bosića, predsjedavajućeg

PRIMLJENO: 20.07.2016			
Organizacija	Klasifikaciona oznaka	Redni broj	Broj priloga
Jedinstvo	01-08	1968	16

Predmet: Obavijest o izboru članova Visokog sudskog i tužilačkog vijeća Bosne i Hercegovine, *dostavlja se*

Poštovani,

Prema odredbama člana 8. Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 25/04, 93/05, 48/07 i 15/08, u daljem tekstu: Zakon o VSTV-u BiH) Visoko sudsko i tužilačko vijeće Bosne i Hercegovine (u daljem tekstu: VSTV/Vijeće) obavještava organ nadležan za izbor člana Vijeća o prestanku mandata ranije izabranog odnosno imenovanog člana Vijeća i od nadležnog organa traži da izabere novog člana.

S tim u vezi, obavještavamo Vas da je na sjednici Vijeća, održanoj 07. jula 2016. godine, u skladu sa odredbama člana 2. stav (4) Pravilnika o izboru članova Visokog sudskog i tužilačkog vijeća Bosne i Hercegovine (br.VSTV-08-0655-17052006 od 17.05.2006. godine, VSTV-08-0471-12032008 od 28.02.2008. godine i 08-02-1685-1/2010 od 14.04.2010. godine), utvrđena pol i nacionalnost kandidata za izbor novog člana Vijeća.

Žrijebom je odlučeno da Predstavnički dom Parlamentarne skupštine Bosne i Hercegovine bira člana koji je srpske nacionalnosti ženskog pola.

Prilikom izbora novog člana Vijeća potrebno je da imate u vidu odredbu člana 4. stav (1) tačka n) Zakona o VSTV-u BiH koja propisuje da jednog člana Vijeća bira Predstavnički dom Parlamentarne skupštine Bosne i Hercegovine, koji ne obavlja pravosudnu funkciju i nije iz reda poslanika Parlamentarne skupštine Bosne i Hercegovine. Takođe, u smislu člana 10. Zakona o VSTV-u BiH novi član Vijeća ispred Predstavničkog doma ne smije obavljati funkciju niti bilo kakvu dužnost u političkoj partiji, kao ni u udruženjima ili fondacijama povezanim sa političkim partijama, te je dužan suzdržati se i od sudjelovanja u aktivnostima političkih partija.

Obzirom da članu Vijeća kojeg bira Predstavnički dom mandat ističe u oktobru 2016. godine, molimo Vas da obavite izbor novog člana i o tome obavijestite Vijeće najkasnije do 01. oktobra 2016. godine.

Za sve dodatne informacije molimo Vas da kontaktirate Odjel za pravna pitanja Sekretarijata VSTV-a BiH na broj telefona 033/704-608.

S poštovanjem,

Prilog: Pravilnik o izboru članova VSTV-a

Dostavljeno:

- naslovu
- a/a





Visoko sudsko i tužilačko vijeće Bosne i Hercegovine
Visoko sudbeno i tužiteljsko vijeće Bosne i Hercegovine
Високи судски и тужилачки савет Босне и Херцеговине
High Judicial and Prosecutorial Council of Bosnia and Herzegovina

VSTV-08-0655-17052006
Sarajevo, 17.5.2006. godine

Na osnovu člana 4. stav 4. Zakona o Visokom sudskom i tužilačkom vijeću Bosne i Hercegovine („Službeni glasnik BiH“, br. 25/04 i 93/05), Visoko sudsko i tužilačko vijeće BiH, na sjednici održanoj dana 17.5.2006. godine, usvaja

P r a v i l n i k
o izboru članova Visokog sudskog i tužilačkog vijeća
Bosne i Hercegovine

Član 1.
Opće odredbe

- (1) Do provođenja novog popisa, etnički sastav Visokog sudskog i tužilačkog vijeća Bosne i Hercegovine je u skladu sa popisom stanovništva iz 1991. godine, što znači da šest Bošnjaka, pet Srba, tri Hrvata i jedan član iz reda ostalih čini sastav Vijeća.
- (2) Ukoliko je moguće, uvijek treba da bude najmanje sedam muških i sedam ženskih članova Vijeća.

Član 2.
Obavješćavanje tijela nadležnih za imenovanje novih članova

- (1) Kada Vijeće u skladu sa članom 8. Zakona o Visokom sudskom i tužilačkom vijeću obavještava nadležnu pravosudnu instituciju ili drugi nadležni organ da izabere novog člana, Vijeće navodi nacionalnost i pol člana koji se treba imenovati.
- (2) Dodatne sudije nemaju pravo da se kandiduju niti da glasaju.
- (3) U istoj obavijesti navedenoj u stavu 1. ovog člana, Vijeće navodi rok za izbor kandidata.
- (4) U slučaju da u Visokom sudskom i tužilačkom vijeću istovremeno treba popuniti više od jednog mjesta, Vijeće odlučuje žrijebom da li se mijenja pol i nacionalnost upražnjenih mjesta. Stepen do kojeg se pol i nacionalnost upražnjenih mjesta

mijenjaju ograničen je polom i nacionalnošću članova koji odlaze iz Vijeća i čiji mandat istovremeno prestaje.

- (5) Žrijebanje se obavlja na sjednici Vijeća. Vijeće žrijebom odlučuje najprije o nacionalnosti člana koji se bira na upražnjeno mjesto. Nakon toga, Vijeće žrijebom odlučuje o polu člana koji se bira na upražnjeno mjesto.

Član 3.

Izbor članova od strane sudija Suda Bosne i Hercegovine

- (1) Kako bi se sudija izabrao u skladu sa članom 4. stav 1. tačka a) Zakona o VSTV-u, on/ona izjavljuje da želi da se kandiduje i obavještava predsjednika Suda Bosne i Hercegovine u roku od jedne sedmice prije datuma određenog za izbor.
- (2) Samo one sudije koje zadovoljavaju kriterije koje je odredilo Vijeće u skladu sa članom 2. stav 1. ovog Pravilnika su podobni da se kandiduju. U slučaju da postoji samo jedna osoba koja zadovoljava ove kriterije, taj sudija se smatra izabranim bez održavanja tajnog glasanja.
- (3) Ukoliko je moguće, za izbor se kandiduje najmanje dvoje sudija.
- (4) Izbor se vrši tajnim glasanjem i osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva. Iskustvo se određuje prema broju godina vršenja sudijske dužnosti, svakog kandidata, kao sudija Suda BiH.

Član 4.

Izbor članova od strane tužilaca Tužilaštva Bosne i Hercegovine

- (1) Kako bi se tužilac izabrao u skladu sa članom 4. stav 1. tačka b) Zakona o VSTV-u, on/ona izjavljuje da želi da se kandiduje i obavještava glavnog tužioca Tužilaštva Bosne i Hercegovine u roku od jedne sedmice prije datuma određenog za izbor.
- (2) Samo oni tužioci koji zadovoljavaju kriterije koje je odredilo Vijeće u skladu sa članom 2. stav 1. ovog Pravilnika su podobni da se kandiduju. U slučaju da postoji samo jedna osoba koja ispunjava ove kriterije, taj tužilac se smatra izabranim bez održavanja tajnog glasanja.
- (3) Ukoliko je moguće, za izbor se kandiduje najmanje dvoje tužilaca.
- (4) Izbor se vrši tajnim glasanjem i osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva.

Iskustvo se određuje prema broju godina vršenja tužilačke dužnosti, svakog kandidata, kao tužilac Tužilaštva Bosne i Hercegovine.

Član 5.

Izbor članova od strane sudija Vrhovnog suda Federacije Bosne i Hercegovine

- (1) Kako bi se sudija izabrao u skladu sa članom 4. stav 1. tačka c). Zakona o VSTV-u, on/ona izjavljuje da želi da se kandiduje i obavještava predsjednika Vrhovnog Suda Federacije Bosne i Hercegovine u roku od jedne sedmice prije datuma određenog za izbor.
- (2) Samo one sudije koje zadovoljavaju kriterije koje je odredilo Vijeće, u skladu sa članom 2. stav 1. ovog Pravilnika su podobni da se kandiduju. U slučaju da postoji samo jedna osoba koja zadovoljava ove kriterije, taj sudija se smatra izabranim bez održavanja tajnog glasanja.
- (3) Ukoliko je moguće, za izbor se kandiduje najmanje dvoje sudija.
- (4) Izbor se vrši tajnim glasanjem i osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva. Iskustvo se određuje prema broju godina vršenja sudijske dužnosti, svakog kandidata, kao sudija Vrhovnog Suda Federacije Bosne i Hercegovine.

Član 6.

Izbor članova od strane tužilaca Federalnog tužilaštva Federacije Bosne i Hercegovine

- (1) Kako bi se tužilac izabrao u skladu sa članom 4. stav 1. tačka d) Zakona o VSTV-u, on/ona izjavljuje da želi da se kandiduje i obavještava glavnog tužioca Tužilaštva Federacije Bosne i Hercegovine u roku od jedne sedmice prije datuma određenog za izbor.
- (2) Samo oni tužioci koji zadovoljavaju kriterije koje je odredilo Vijeće u skladu sa članom 2. stav 1. ovog Pravilnika su podobni da se kandiduju. U slučaju da postoji samo jedna osoba koja zadovoljava ove kriterije, taj tužilac se smatra izabranim bez održavanja tajnog glasanja.
- (3) Ukoliko je moguće, za izbor se kandiduje najmanje dvoje tužilaca.
- (4) Izbor se vrši tajnim glasanjem i osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva. Iskustvo se određuje prema broju godina vršenja tužilačke dužnosti, svakog kandidata, kao tužilac Federalnog tužilaštva Federacije Bosne i Hercegovine.

Član 7.

Izbor članova od strane sudija Vrhovnog suda Republike Srpske

- (1) Kako bi se sudija izabrao u skladu sa članom 4. stav 1. tačka e) Zakona o VSTV-u, on/ona izjavljuje da želi da se kandiduje i obavještava predsjednika Vrhovnog Suda Republike Srpske u roku od jedne sedmice prije datuma određenog za izbor.
- (2) Samo one sudije koje zadovoljavaju kriterije koje je odredilo Vijeće, u skladu sa članom 2. stav 1. ovog Pravilnika su podobni da se kandiduju. U slučaju da postoji samo jedna osoba koja zadovoljava ove kriterije, taj sudija se smatra izabranim bez održavanja tajnog glasanja.
- (3) Ukoliko je moguće, za izbor se kandiduje najmanje dvoje sudija.
- (4) Izbor se vrši tajnim glasanjem i osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva. Iskustvo se određuje prema broju godina vršenja sudijske dužnosti, svakog kandidata, kao sudija Vrhovnog Suda Republike Srpske.

Član 8.

Izbor članova od strane tužilaca Republičkog tužilaštva Republike Srpske

- (1) Kako bi se tužilac izabrao u skladu sa članom 4. stav 1. tačka f) Zakona o VSTV-u, on/ona izjavljuje da želi da se kandiduje i obavještava glavnog tužioca Republičkog tužilaštva Republike Srpske u roku od jedne sedmice prije datuma određenog za izbor.
- (2) Samo oni tužioci koji zadovoljavaju kriterije koje je odredilo Vijeće u skladu sa članom 2. stav 1. ovog Pravilnika su podobni da se kandiduju. U slučaju da postoji samo jedna osoba koja zadovoljava ove kriterije, taj tužilac se smatra izabranim bez održavanja tajnog glasanja.
- (3) Ukoliko je moguće, za izbor se kandiduje najmanje dvoje tužilaca.
- (4) Izbor se vrši tajnim glasanjem i osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva. Iskustvo se određuje prema broju godina vršenja tužilačke dužnosti, svakog kandidata, kao tužilac u Republičkom tužilaštvu Republike Srpske.

Član 9.

Izbor članova od strane kantonalnih i općinskih sudija

- (1) Tajnim glasanjem svaki sud predlaže najmanje jednog kandidata (a najviše tri kandidata) koji učestvuju u pismenom glasanju koje organizuje predsjednik Vrhovnog Suda Federacije Bosne i Hercegovine u skladu sa članom 4. stav 1. tačka g), Zakona o VSTV-u.
- (2) Samo one sudije koje zadovoljavaju kriterije koje je odredilo Vijeće, u skladu sa članom 2. stav 1. ovog Pravilnika, su podobni za predlaganje.
- (3) Nakon što predsjednik Vrhovnog suda Federacije Bosne i Hercegovine primi sve prijedloge navedene u stavu 1. ovog člana, on šalje usklađenu listu prijedloga svim predsjednicima kantonalnih i općinskih sudova. Sve sudije kantonalnih i općinskih sudova su podobni da glasaju za jednog od kandidata sa te izborne liste za člana Visokog sudskog i tužilačkog vijeća.
- (4) Izbor se vrši tajnim glasanjem koje organizuje predsjednik Vrhovnog suda Federacije Bosne i Hercegovine, a osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva. Iskustvo se određuje prema broju godina vršenja sudijske službe svakog kandidata.

Član 10.

Izbor članova od strane kantonalnih tužilaca

- (1) Kako bi se tužilac izabrao u skladu sa članom 4. stav 1. tačka h) Zakona o VSTV-u, on/ona izjavljuje da želi da se kandiduje i obavještava glavnog tužioca Federalnog tužilaštva Federacije Bosne i Hercegovine u roku od jedne sedmice prije datuma određenog za izbor.
- (2) Samo oni tužioci koji ispunjavaju kriterije koje je odredilo Vijeće u skladu sa članom 2. stav 1. ovog Pravilnika su podobni da se kandiduju.
- (3) Glavni tužilac Federalnog tužilaštva Federacije Bosne i Hercegovine će se pobrinuti da se najmanje dvoje tužilaca predloži za kandidovanje.
- (4) Izbor se vrši tajnim glasanjem koje organizuje glavni tužilac Federalnog tužilaštva Federacije Bosne i Hercegovine i osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva. Iskustvo se određuje prema broju godina vršenja tužilačke dužnosti svakog kandidata.

Član 11.

Izbor članova od strane okružnih i osnovnih sudija

- (1) Tajnim glasanjem svaki sud predlaže najmanje jednog kandidata (a najviše tri kandidata) koji učestvuju u pismenom glasanju koje organizuje predsjednik Vrhovnog suda Republike Srpske u skladu sa članom 4. stav 1. tačka i) Zakona o VSTV-u.
- (2) Samo one sudije koje zadovoljavaju kriterije koje je odredilo Vijeće, u skladu sa članom 2. stav 1. ovog Pravilnika su podobni za predlaganje.
- (3) Nakon što predsjednik Vrhovnog suda Republike Srpske primi sve prijedloge navedene u stavu 1. ovog člana, on šalje usklađenu listu prijedloga svim predsjednicima okružnih i osnovnih sudova. Sve sudije okružnih i osnovnih sudova su podobni da glasaju za jednog od kandidata sa te izborne liste za člana Visokog sudskog i tužilačkog vijeća.
- (4) Izbor se vrši tajnim glasanjem koje organizuje predsjednik Vrhovnog suda Republike Srpske, a osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva. Iskustvo se određuje prema broju godina vršenja sudijske dužnosti svakog kandidata.

Član 12.

Izbor članova od strane okružnih tužilaca

- (1) Kako bi se tužilac izabrao u skladu sa članom 4. stav 1. tačka j) Zakona o VSTV-u, on/ona izjavljuje da želi da se kandiduje i obavještava glavnog tužioca Republičkog tužilaštva Republike Srpske u roku od jedne sedmice prije datuma određenog za izbor.
- (2) Samo oni tužioci koji zadovoljavaju kriterije koje je odredilo Vijeće u skladu sa članom 2. stav 1. ovog Pravilnika su podobni da se kandiduju.
- (3) Glavni tužilac Republičkog tužilaštva Republike Srpske će se pobrinuti da se najmanje dvoje tužilaca predloži za kandidovanje.
- (4) Izbor se vrši tajnim glasanjem koje organizuje glavni tužilac Republičkog tužilaštva Republike Srpske i osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva. Iskustvo se određuje prema broju godina vršenja tužilačke dužnosti svakog kandidata.

Član 13.

Izbor članova od strane Pravosudne komisije Brčko Distrikta

- (1) Kako bi se tužilac ili sudija izabrao u skladu sa članom 4. stav 1. tačka k) Zakona o VSTV-u, on/ona izjavljuje da želi da se kandiduje i obavještava predsjednika Pravosudne komisije Brčko Distrikta u roku od jedne sedmice prije datuma određenog za izbor.
- (2) Samo oni tužioci i sudije koji zadovoljavaju kriterije koje je odredilo Vijeće, u skladu sa članom 2. stav 1. ovog Pravilnika su podobni da se kandiduju.
- (3) Izbor se vrši tajnim glasanjem koje organizuje Pravosudna komisija Brčko Distrikta Bosne i Hercegovine i osoba se smatra izabranom ukoliko je većina glasova u njenu korist. U slučaju da je jednak broj glasova u korist dvoje ili više kandidata, smatra se izabranim onaj kandidat koji ima najviše godina iskustva. Iskustvo se određuje prema broju godina vršenja sudijske i/ili tužilačke dužnosti svakog kandidata.

Član 14.

Izbor članova od strane Advokatske komore Federacije Bosne i Hercegovine

- (1) Kako bi se advokat izabrao u skladu sa članom 4. stav 1. tačka l) Zakona o VSTV-u, on/ona izjavljuje da želi da se kandiduje i obavještava predsjednika Advokatske komore Federacije Bosne i Hercegovine u roku od jedne sedmice prije datuma određenog za izbor.
- (2) Samo oni advokati koji zadovoljavaju kriterije koje je odredilo Vijeće, u skladu sa članom 2. stav 1. ovog Pravilnika su podobni da se kandiduju.
- (3) Predsjednik Advokatske komore Republike Srpske će osigurati da se najmanje dvoje advokata kandiduje za izbor.
- (4) Izbor se vrši tajnim glasanjem koje organizuje Advokatska komora Federacije Bosne i Hercegovine.

Član 15.

Izbor članova od strane Advokatske komore Republike Srpske

- (1) Kako bi se advokat izabrao u skladu sa članom 4. stav 1. tačka m) Zakona o VSTV-u, on/ona izjavljuje da želi da se kandiduje i obavještava predsjednika Advokatske komore Republike Srpske u roku od jedne sedmice prije datuma određenog za izbor.
- (2) Samo oni advokati koji zadovoljavaju kriterije koje je odredilo Vijeće, u skladu sa članom 2. stav 1. ovog Pravilnika su podobni da se kandiduju.

- (3) Predsjednik Advokatske komore Republike Srpske će osigurati da se najmanje dvoje advokata kandiduje za izbor.
- (4) Izbor se vrši tajnim glasanjem koje organizuje Advokatska komora Republike Srpske.

Član 16.

Izbor članova od strane Predstavničkog doma Parlamentarne skupštine Bosne i Hercegovine

- (1) Samo one osobe koje zadovoljavaju kriterije koje je odredilo Vijeće, u skladu sa članom 2. stav 1. tačka n) novog Pravilnika su podobni kandidati za izbor od strane Predstavničkog doma Parlamentarne skupštine Bosne i Hercegovine.

Član 17.

Izbor članova od strane Vijeća ministara Bosne i Hercegovine

- (1) Samo one osobe koje zadovoljavaju kriterije koje je odredilo Vijeće, u skladu sa članom 2. stav 1. tačka o) ovog Pravilnika su podobni kandidati za izbor od strane Vijeća ministara Bosne i Hercegovine.

Član 18.

Stupanje na snagu i objavljivanje

- (1) Ovaj Pravilnik stupa na snagu danom donošenja i objavljuje se u Službenom glasniku Bosne i Hercegovine.


Branko Perić

Predsjednik Visokog sudskog i tužilačkog vijeća BiH



Visoko sudsko i tužilačko vijeće Bosne i Hercegovine
Visoko sudbeno i tužiteljsko vijeće Bosne i Hercegovine
Високи судски и тужилачки савјет Босне и Херцеговине
High Judicial and Prosecutorial Council of Bosnia and Herzegovina

Broj: VSTV-08-0471-12032008

Datum: 12.3.2008. godine

Na osnovu člana 4. stav 4. Zakona o Visokom sudskom i tužilačkom vijeću Bosne i Hercegovine ("Službeni glasnik BiH", br. 25/04, 93/05, 48/07 i 15/08), Visoko sudsko i tužilačko vijeće Bosne i Hercegovine na sjednici održanoj 28.2.2008. godine, donijelo je

P r a v i l n i k **o izmjenama i dopunama Pravilnika o izboru članova** **Visokog sudskog i tužilačkog vijeća Bosne i Hercegovine**

Član 1.

U Pravilniku o izboru članova Visokog sudskog i tužilačkog vijeća Bosne i Hercegovine u članu 1. (Opšte odredbe), u stavu (2) riječi „muških i sedam ženskih“ i tačka na kraju rečenice se brišu, a dodaju se riječi „suprotnog pola“.

Član 2.

U članu 2. (Obavješćavanje tijela nadležnih za imenovanje novih članova), u stavu (2) iza riječi „kandiduju“ dodaje se zarez, a riječ „niti“ se briše i zamjenjuje riječima „ali imaju pravo“.

Stav (4) mijenja se i glasi:

„(4) U slučaju da u Visokom sudskom i tužilačkom vijeću istovremeno treba popuniti više od jednog mjesta, Vijeće žrijebom odlučuje o nacionalnosti i polu kandidata za upražnjena mjesta da bi se obezbijedio etnički i polni sastav predviđen u članu 1. stav 1. ovog Pravilnika, pri čemu će se voditi računa da se osigura odgovarajući etnički sastav podvijeća. Žrijebanje uključuje sve institucije čijim predstavnicima mandat prestaje u istoj godini.“

Iza stava (5) dodaje se novi stav (6) koji glasi:

(6) Od žrijebanja će biti izuzete one institucije koje na upražnjeno mjesto u VSTV-u trebaju dati kandidata određene etničke pripadnosti da bi se na taj način osigurao odgovarajući etnički sastav podvijeća.

Član 3.

U članu 3. (Izbor članova od strane sudija Suda Bosne i Hercegovine), u stavu (1) iza riječi „Suda Bosne i Hercegovine“ dodaje se riječ „najkasnije“, a riječi „jedne sedmice“ zamjenjuju se riječima „tri dana“.

U stavu (2), u drugoj rečenici, riječi „jedna osoba koja“ zamjenjuju se riječima „jedan sudija koji“, a na kraju rečenice se umjesto tačke stavlja zarez i dodaju riječi „ukoliko na to pristane“.

Član 4.

U članu 4. (Izbor članova od strane tužilaca Tužilaštva Bosne i Hercegovine), u stavu (1) iza riječi „Tužilaštva Bosne i Hercegovine“ dodaje se riječ „najkasnije“, a riječi „jedne sedmice“ zamjenjuju se riječima „tri dana“.

U stavu (2), u drugoj rečenici, riječi „jedna osoba koja“ zamjenjuju se riječima „jedan tužilac koji“, a na kraju rečenice se umjesto tačke stavlja zarez i dodaju riječi „ukoliko na to pristane“.

Član 5.

U članu 5. (Izbor članova od strane sudija Vrhovnog suda Federacije Bosne i Hercegovine), u stavu (1) iza riječi „Vrhovnog suda Federacije Bosne i Hercegovine“ dodaje se riječ „najkasnije“, a riječi „jedne sedmice“ zamjenjuju se riječima „tri dana“.

U stavu (2), u drugoj rečenici, riječi „jedna osoba koja“ zamjenjuju se riječima „jedan sudija koji“, a na kraju rečenice se umjesto tačke stavlja zarez i dodaju riječi „ukoliko na to pristane“.

Član 6.

U članu 6. (Izbor članova od strane tužilaca Federalnog tužilaštva Federacije Bosne i Hercegovine), u stavu (1) iza riječi „Federalnog tužilaštva Federacije Bosne i Hercegovine“ dodaje se riječ „najkasnije“, a riječi „jedne sedmice“ zamjenjuju se riječima „tri dana“.

U stavu (2), u drugoj rečenici, riječi „jedna osoba koja“ zamjenjuju se riječima „jedan tužilac koji“, a na kraju rečenice se umjesto tačke stavlja zarez i dodaju riječi „ukoliko na to pristane“.

Član 7.

U članu 7. (Izbor članova od strane sudija Vrhovnog suda Republike Srpske), u stavu (1) iza riječi „Vrhovnog suda Republike Srpske“ dodaje se riječ „najkasnije“, a riječi „jedne sedmice“ zamjenjuju se riječima „tri dana“.

U stavu (2), u drugoj rečenici, riječi „jedna osoba koja“ zamjenjuju se riječima „jedan sudija koji“, a na kraju rečenice se umjesto tačke stavlja zarez i dodaju riječi „ukoliko na to pristane“.

Član 8.

U članu 8. (Izbor članova od strane tužilaca Republičkog tužilaštva Republike Srpske), u stavu (1) iza riječi „Republičkog tužilaštva Republike Srpske“ dodaje se riječ „najkasnije“, a riječi „jedne sedmice“ zamjenjuju se riječima „tri dana“.

U stavu (2), u drugoj rečenici, riječi „jedna osoba koja“ zamjenjuju se riječima „jedan tužilac koji“, a na kraju rečenice se umjesto tačke stavlja zarez i dodaju riječi „ukoliko na to pristane“.

Član 9.

U članu 9. (Izbor članova od strane kantonalnih i općinskih sudija), stav (1) mijenja se i glasi:
„(1) Na osnovu prijava o kandidaturi sudija tog suda, tajnim glasanjem svaki sud može predložiti jednog kandidata za izbor, u glasanju koje organizuje predsjednik Vrhovnog Suda Federacije Bosne i Hercegovine u skladu sa članom 4. stav 1. tačka g), Zakona o VSTV-u.“

Član 10.

U članu 10. (Izbor članova od strane kantonalnih tužilaca), stav (1) mijenja se i glasi:
„(1) Na osnovu prijava o kandidaturi tužilaca tog tužilaštva, tajnim glasanjem svako kantonalno tužilaštvo može predložiti jednog kandidata za izbor u glasanju kojim rukovodi glavni tužilac Federalnog tužilaštva Federacije Bosne i Hercegovine u skladu sa članom 4. stav 1. tačka h) Zakona o VSTV-u.“

Stav (3) mijenja se i glasi:

„(3) Nakon što glavni tužilac Federalnog tužilaštva Federacije Bosne i Hercegovine primi sve prijedloge navedene u stavu 1. ovog člana, on šalje usklađenu listu prijedloga svim glavnim tužiocima kantonalnih tužilaštava. Svi tužioci kantonalnih tužilaštava su podobni da glasaju za jednog od kandidata sa te izborne liste u Visoko sudsko i tužilačko vijeće.“

Član 11.

U članu 11. (Izbor članova od strane okružnih i osnovnih sudija), stav (1) mijenja se i glasi:
„(1) Na osnovu prijava o kandidaturi sudija tog suda, tajnim glasanjem svaki sud može predložiti jednog kandidata za izbor, u glasanju koje organizuje predsjednik Vrhovnog suda Republike Srpske u skladu sa članom 4. stav 1. tačka i) Zakona o VSTV-u.“

Član 12.

U članu 12. (Izbor članova od strane okružnih tužilaca), stav (1) mijenja se i glasi:
„(1) Na osnovu prijava o kandidaturi tužilaca tog tužilaštva, tajnim glasanjem svako kantonalno tužilaštvo može predložiti jednog kandidata za izbor u glasanju kojim rukovodi glavni tužilac Republičkog tužilaštva Republike Srpske u skladu sa članom 4. stav 1. tačka j) Zakona o VSTV-u.“

Stav (3) mijenja se i glasi:

„(3) Nakon što glavni tužilac Republičkog tužilaštva Republike Srpske primi sve prijedloge navedene u stavu 1. ovog člana, on šalje usklađenu listu prijedloga svim glavnim tužiocima okružnih tužilaštava. Svi tužioci okružnih tužilaštava su podobni da glasaju za jednog od kandidata sa te izborne liste u Visoko sudsko i tužilačko vijeće.“

Član 13.

U članu 13. (Izbor članova od strane Pravosudne komisije Brčko Distrikta), u stavu (1) iza riječi „Pravosudne komisije Brčko Distrikta“ dodaje se riječ „najkasnije“, a riječi „jedne sedmice“ zamjenjuju se riječima „tri dana“.

Član 14.


U članu 14. (Izbor članova od strane Advokatske komore Federacije Bosne i Hercegovine), u stavu (1) iza riječi „Advokatske komore Federacije Bosne i Hercegovine“ dodaje se riječ „najkasnije“, a riječi „jedne sedmice“ zamjenjuju se riječima „tri dana“.

Član 15.

U članu 15. (Izbor članova od strane Advokatske komore Republike Srpske), u stavu (1) iza riječi „Advokatske komore Republike Srpske“ dodaje se riječ „najkasnije“, a riječi „jedne sedmice“ zamjenjuju se riječima „tri dana“.

Član 16.

Odluka stupa na snagu danom donošenja.



tužilačkog vijeća Bosne i Hercegovine



Na osnovu člana 4. stav 4. Zakona o Visokom sudskom i tužilačkom vijeću Bosne i Hercegovine ("Službeni glasnik BiH", br. 25/04, 93/05, 48/07 i 15/08), Visoko sudsko i tužilačko vijeće Bosne i Hercegovine na sjednici održanoj 14. aprila 2010. godine, donijelo je

PRAVILNIK
o izmjeni Pravilnika o izboru članova Visokog sudskog i tužilačkog vijeća BiH

I

U Pravilniku o izboru članova Visokog sudskog i tužilačkog vijeća Bosne i Hercegovine, br. VSTV-08-0655-17052006 i VSTV-08-0471-12032008, u članu 1. stav 2. mijenja se i glasi:

"(2) Ukoliko je moguće, uvijek treba da bude najmanje šest članova Vijeća suprotnog spola i to:

- a) najmanje dva člana suprotnog spola izabrana od strane tijela nadležnih za izbor iz Republike Srpske,
- b) najmanje dva člana suprotnog spola izabrana od strane tijela nadležnih za izbor iz Federacije BiH,
- c) najmanje dva člana suprotnog spola izabrana od strane tijela BiH i Brčko Distrikta nadležnih za izbor."

II

Ovaj pravilnik stupa na snagu danom donošenja.

Broj: 08-02-1685-1/2010

Sarajevo, 14. april 2010. godine



Predsjednik

Milorad Novković
Milorad Novković